

爾雅義疏

冊一

爾雅義疏

四部備要

經部

上海中華書局據家刻足

本校刊

桐鄉 陸費達總勘

杭縣 高時顯輯校

杭縣 丁輔之監造

上諭

光緒七年十二月二十四日內閣

奉

上諭前據順天府府尹游百川呈進已故戶部主事郝懿行所著書四種當交南書房翰林閱看據稱郝懿行學問淵博經術湛深嘉慶年閒海內推重所著春秋比春秋說略爾雅義疏山海經箋疏各書精博邃密足資攷證所進之書卽著留覽欽此

奏摺

順天府府尹

臣游百川跪

奏爲代進前戶部主事解經之書恭摺仰祈

聖鑒事竊維爲學莫先於研經而著書尤貴乎析義

臣籍隸山東

稔知同鄉前戶部主事郝懿行所著春秋說略十二卷春秋

比二卷爾雅義疏十九卷山海經箋疏十八卷並附圖讚一

卷訂譌一卷積數十年之精力而成其書頗爲賅洽伏念春

秋有褒譏之義說經之門戶宜分爾雅爲訓詁之宗名物之

異同必辨郝懿行窮源竟委曲引旁徵曾博極乎羣書求折

衷於一是至如山海經一書劉歆駭其神奇郭璞稱其靈化

又欲事刊疏繆辭取雅馴既富搜羅復精辨覈可謂殫心典

籍無愧通方該主事係山東棲霞縣廩膳生乾隆丙午優貢

戊申舉人嘉慶己未進士戶部江南司主事髫齡勵志皓首

窮經迹其成書有裨實學今其孫現任順天府東路同知郝聯薇收存原稿校繕成編臣謹代進呈以備

採納伏察康熙年閒胡渭進禹貢錐指乾隆年閒顧棟高進春秋大事表均蒙

聖祖仁皇帝

高宗純皇帝錫以嘉予撥入

四庫今郝懿行所著等編儻蒙

皇上典學之餘

俯賜乙覽則儒生稽古之榮當與胡渭顧棟高並傳於藝苑矣謹將裝成書三函計十六本恭摺隨同上進伏乞

皇太后

皇上聖鑒謹

奏

爾雅義疏序

學者有志治經必先明古字古言古字者倉頡古文及籀文也古言者三代秦漢所讀之音與今不同也自隸書行而古字漸亡六朝以後之韻書出而古言漸亡就晚近之心思耳目求往古之制度文教以致微茫沈晦殆逾千載恭逢

盛世經學昌明則有傑出之士綜易詩離騷凡漢以前有韻之文皆得本音而別其部居明其通段日積月久相與引申復有通儒就許書所存之古籀又博采自古鍾鼎遺文以始一終亥之義依類而編之分合而辯之俗儒以爲模黏影響而能一皆就理悉合六書有是

二者斯能訓故通而五經立爾雅二十篇

本漢志今爾雅十九篇愚意以爲釋詁文多舊分二

篇又詩正義引爾雅序篇云釋詁釋言通古今之字古與今異言也釋訓言形貌也詩正義但疏詁訓二字之義所引不全則爾雅尚有

序篇今

亡之矣則訓故之淵海五經之梯航也然至唐代但用郭景純之注

而漢學不傳至宋邢氏作疏但取唐人五經正義綴緝而成遂滋闕

漏乾隆閒邵二雲學士作爾雅正義翟晴江進士作爾雅補郭然後
郭注未詳未聞之說皆可疏通證明而猶未至於旁皇周浹窮深極
遠也迨嘉慶閒棲霞郝戶部蘭皋先生之爾雅義疏最後成書其時
南北學者知求於古字古言於是通貫融會諧聲轉注段藉引端竟
委觸類旁通豁然盡見且薈萃古今一字之異一義之偏罔不搜羅
分別是非必及根原鮮逞胸臆蓋此書之大成陵唐躐宋追秦漢而
明周孔者也翔鳳昔在嘉慶辛未滯迹京邸始識先生時接言論每
致商榷輒付掌錄不以前脩而輕後生時所纂山海經箋疏不涉荒
怪而惟求實是已行於世爾雅則未卒業一官不達九原難起後於
湘中得太傅阮公所輯經解一再瀏覽得其大端後制府陸公單行
其書與阮本無異嘉興高君又得足本以校阮陸兩本多四之一或
云刪去之文出高郵王石渠先生手或云他人所刪而嫁名於王夫
說一經之文必合衆家之議前此者未必是後此者未必非惟在學

者求其本根不立門戶同歸康莊是以河帥楊公得高君之本而爲
流播於時剗剗僅半而河帥卽世茲胡君心耘始續成之而後郝氏
一家之言遂有完書誠盛事也咸豐六年八月後學長洲宋翔鳳謹
記

爾雅郭注義疏上之一

棲霞郝懿行學

釋詁第一

釋者說文云解也从采取其分別物也爾雅之作主於辨別文字解釋形聲故諸篇俱曰釋焉詁者說文云訓

故言也从古聲古故也从十口識前言者也釋文引張揖雜字云詁者古今之異語也然則詁之爲言故也故之爲言古也詁通作故亦通作古釋文詁兼古故二音是也又引樊光李巡本釋詁作釋故詩周南釋文亦云樊孫等爾雅本皆爲釋故說文言部引詩曰詁訓漢書藝文志作故訓詩烝民云古訓是式蓋古訓卽故訓故訓亦卽詁訓並字異而義通矣此篇自始也以下終也以上皆舉古言釋以今語其闕文字重複展轉相通蓋有諸家增益用廣異聞釋言釋訓以下亦猶是焉

初哉首基肇祖元胎俶落權輿始也

尚書曰三月哉生魄詩曰令終有俶又曰俶載南畝又曰訪予

落止又曰胡不承權輿胎胎未成亦物之始也其餘皆義之常行者耳此所以釋古今之異言通方俗之殊語

此釋始之義也說文云始女之初也釋名云始息也言滋息也按始與治通書云在治忽史記夏紀作來始滑漢書律曆志作七始

詠是始治通也初者裁衣之始哉者草木之始基者築牆之始肇者開戶之始祖者人之始胎者生之始也每字皆有本義但俱訓始例得兼通不必與本義相關也初既訓始觀禮及檀弓注又訓故者故亦古也古亦始也始與治通故下文又云治故也哉者才

之段音說文云才艸木之初也經典通作哉尚書大傳云儀伯之樂舞饗哉詩云陳錫哉周鄭俱以哉爲始也郭注下文茂勉引大

傳茂哉茂哉釋文或作茂才書云往哉汝諧張平子碑作往才汝
 諧哉生魄晉書夏侯湛傳作才生魄是才哉古字通又通作載陳
 錫哉周左氏宣十五年傳作陳錫載周書載采采史記夏紀作始
 事詩詩載見時王傳亦云載始也是載哉通爾雅釋文哉亦作栽
 中庸栽者培之鄭注栽讀如文王初載之載栽或爲茲茲栽哉古
 皆音同字通也首者與鼻同意方言云鼻始也畧之初生謂之鼻
 人之初生謂之首是首鼻其義同特言此者人生之始首鼻居先
 也胎者一切經音義一引爾雅舊注云胎始養也漢書枚乘傳云
 福生有基禱生有胎服虔注基胎皆始也通作始詩始及公子同
 歸傳始始也釋文始作迨始也爾雅釋文胎孫炎大才反本或作
 台是台迨始俱胎之段音矣倣者說文云始也又土部城一曰始
 也則其義同釋名云荊豫人謂長婦曰孰孰祝也祝始也是孰與
 倣音義又同也落者詩訪子落止逸周書文酌篇云物無不落毛
 傳及孔晁注竝云落始也落本殞墜之義故云殞落此訓始者始
 終代燼榮落互根易之消長書之治亂其道皆然愚者闇於當前
 達人燭以遠覽落之訓外又訓始名若相反而義實相通矣權輿
 者廣雅疏證以爲其萌蘗蒨之段音則與才落義皆相近詩不承
 權輿文酌篇云一榦勝權輿與周月篇云日月權輿大戴禮語志篇
 云百草權輿皆以權輿連文古書多段偕今略爲標舉如基肇祖
 三字俱訓爲始詩夙夜基命禮孔子閑居基命作其命書不丕基
 漢石經作不其儀禮士喪禮注古文基基作期是期其通基也肇
 乃羣之段音說文羣始開也詩后稷肇祀禮表記作北祀是北肇
 通羣也祖古金石文字作且書黎民阻飢史記集解據今文尚書
 作祖飢索隱據古文作阻飢詩六月徂暑箋徂猶始也是徂阻通
 祖矣凡聲同之
 字古多通用

林丞天帝皇王后辟公侯君也

詩曰有王有林又曰文王

丞哉其餘義皆通見詩書

說文云君尊也儀禮喪服傳云君至尊也鄭注天子諸侯及卿大夫有地者皆曰君逸周書諡法篇云賞慶刑威曰君從之成羣曰君白虎通云君羣也羣下之所歸心也然則君之言羣凡羣衆所歸皆謂之君矣林丞者衆也又訓君者衆之所歸斯謂之君與君羣義同也林者詩有王有林毛傳用爾雅楚辭天問篇云伯林雉經王逸注及漢書律曆志並云林君也丞者釋文云本又作蒸蒸烝古字通詩文王烝哉毛傳烝君也釋文引韓詩云烝美也美與君義亦近凡臣子於君父以美大之詞言之故皇謂之大亦謂之美亦謂之君烝謂之衆亦謂之美亦謂之君凡有數義而皆通斯爾雅諸文之例也不明乎此則窒矣林亦盛大之詞與烝同意故平都相蔣君碑云於穆林丞以二字連文其義與單文同也天與帝亦訓爲君者天帝俱尊大之極稱故臣以目君焉易說卦云乾爲天爲君左氏宣四年傳云君天也驕冠子道端篇云君者天也是皆以君爲天之證古者稱君或言昊天或言天王或言天子其名異其實同也說文云帝諦也王天下之號也風俗通引書大傳云帝者任德設刑以則象之言其能行天道舉錙審諦諡法篇云德象天地曰帝是帝本天之號又爲王者之稱故詩上帝板板上帝甚蹈毛傳皆以上帝爲王矣皇者說文云大也从自自始也始皇者三皇大君也諡法篇云靜民則法曰皇詩有皇上帝毛傳皇君也凡詩之皇尸皇祖土昏禮之皇舅士虞禮記之皇祖鄭皆以皇爲君也王者說文云天下所歸往也風俗通引書大傳同諡法篇云仁義所在曰王仁義所在是卽民所歸往也王與皇同意故春秋繁露云王者皇也書建用皇極洪範五行傳作建用王極皇王其義同也后者說文云繼體君也周禮量人營后宮禮記內則

后王命冢宰鄭注竝云后君也釋文引孫炎云后王君王也薛者下文云法也此訓君者君爲人所法也人所法爲君猶人所歸往爲王矣詩內薛字毛鄭多訓爲君書馬鄭注義亦同也公侯者列國之君也故釋名云公君也君尊解也周禮牛人掌公牛中車掌公車鄭注竝云公猶官也史記孝文紀索隱曰官猶公也然則公亦爲官官亦爲公反覆相訓義得兼通公官又一聲之轉故廣雅云官君也是官亦稱君矣侯者詩云洵直且侯侯文王孫子謹爾侯度毛鄭竝云侯君也羔裘釋文引韓詩云侯美也又訓美者與烝同義故烝侯毛傳竝云君韓詩竝云美臣子於君父以美大之詞言之亦其證也公侯皆有本義白虎通言公者公正無私侯者侯逆順皆其義又訓君者公侯雖臣於其國稱君也然則伯子男亦列國之君此不言者舉尊以例卑及卿大夫之有地者亦得兼焉包

弘廓宏溥介純夏撫厖墳嘏不奕洪誕戎駿假京碩濯訄宇穹壬路

淫甫景廢壯冢簡葑畎咥將業蓆大也

詩曰我受命溥將又曰亂如

王公伊濯訄謨定命有壬有林厥聲載路既有淫威廢爲殘賊爾土

字畎章緇衣之蓆兮廓落宇宙穹隆至極亦爲大也葑義未聞尸子

曰此皆大有十餘名而同一實

釋君之後繼以大者君亦大也故老子云天大地大王者亦大說文本之而云天大地大人亦大尸子本此而云天帝后皇薛公皆大也是皆君亦訓大之義推此而言林烝亦有大意公侯亦兼大名其義舉可見矣廓者方言云張小使大謂之廓一切經音義九引

孫炎云廓張之大也詩云憎其式廓文選西京賦云廓開九市毛
傳及薛綜注竝云廓大也孟子云知皆擴而充之趙岐注擴廓也
釋名云郭廓也廓落在城外也公羊文十五年傳云恢郭也恢郭
卽恢廓故意林引風俗通云郭大也詩皇矣釋文郭本又作廓蓋
正義本作廓釋文本作郭而音亦苦霍反是郭廓通擴義亦同矣
宏者說文云屋梁響也書用宏茲貢正義引樊光曰周禮云其聲
大而宏禮記月令其器闕以奄呂覽孟冬紀作其器宏以弇史記
司馬相如傳云必將崇論閎議漢書閎作鉞一切經音義十七云
宏古文裕同是裕闕俱與宏通逸周書皇門篇之闕孔晁音皇詩
執競篇之喤徐邈又音宏宏皇聲轉皇亦大也是音義又通矣溥
者經典與普通溥天之下左氏昭七年傳及孟子竝作普天之
下儀禮鄭注普大也是普溥通又通鋪與敷詩鋪敦淮漬釋文引
韓詩鋪作敷云大也禮記祭義云溥之而橫乎四海釋文溥本亦
作敷蓋溥鋪敷俱从甫聲凡聲同者字亦通也溥有聲轉說文云
旁溥也聲轉爲旁溥又爲旁魄又爲彭魄又爲旁勃又爲盤礴竝
以聲爲義矣介者芥之段借也說文方言竝云芥大也經典通作
介逸周書武順篇云集固介德離騷云彼堯舜之耿介孔晁王逸
注竝云介大也純者奄之段借也說文云奄大也讀若鶉經經典通
作純周語云俾莫不任肅純恪文選魯靈光殿賦云承蒼昊之純
殷韋昭及張載注竝云純大也又方言云純好也呂覽士容篇注
純美也漢書注純善也純又訓善者與介同意故介訓善又訓大
純訓大又訓善也好美皆善矣純通作淳鄭語云黎爲高辛氏火
正以淳耀惇大韋昭注淳大也是淳純通矣夏者方言云大也樂
記同說文以夏爲中國之人蓋有威儀備具之美周禮染人秋染
夏及夏采說者以夏爲五色之名爾雅兼包二義故訓爲大左傳
云能夏則大書云羽畎夏翟可知二義兼矣懽者說文云覆也覆

冒義亦爲大故方言云撫大也詩亂如此撫毛傳同通作撫儀禮
公食大夫禮及周禮賸入鄭注並云撫大也撫義與撫同韋昭晉
語注云撫豐也豐亦大也說文云撫荒聲轉詩天作傳荒大也凡聲同聲
書無作撫是聲義又同矣撫荒聲轉詩天作傳荒大也凡聲同聲
近聲轉之字其義多存乎聲皆此例也麗者說文云石大也方言
云麗之大也麗朦聲近故方言又云秦晉之閒凡大貌謂之朦或
謂之麗矣墳者釋云墳大防方言云墳地大也青幽之閒凡土
而高且大者謂之墳詩牂羊墳首周禮司恒共墳燭通作賁詩賁
鼓維鏞書用宏茲賁賁皆大也又通作頌說文云頌大頭也引詩
有頌其首正義據釋詁云頌與墳字雖異音義同此說是也但古
書多段俗頌首之頌則頌爲正體墳乃段俗書正義據樊光引詩
作有賁其首賁亦段俗矣墳者說文云大遠也郊特牲云墳長也
大也長遠與大義近故方言云墳大也通作格少牢饋食禮云以
墳于主人鄭注古文墳爲格士冠禮云孝友時格鄭注今文格爲
墳又通作假詩駸假無言左氏昭廿年傳作駸假無言士冠禮及
禮運釋文並云墳本或作假蓋墳爲本字假爲通俗假格古音相
轉故其字俱通矣假古讀若鼓夏古讀若戶故鄉飲酒義云夏之
爲言假也皆以聲近爲義也不者書云三苗不敘史記夏紀作三
苗大序漢書郊祀志引大誓曰丕天之大律鄭注丕大也張參五
經文字云丕石經作丕見春秋傳按左傳丕鄭父是也爾雅本亦
有作丕者故釋文云丕字又作丕通作丕戴氏震毛鄭詩考正云
書立政篇丕丕基漢石經作丕不其凡詩中不顯不承不承不時不寧
不康皆當讀爲丕詩之不顯不承卽書之不顯不承也奕者詩之
奕奕毛俱訓大文選秋懷詩注引韓詩章句云奕奕盛貌盛大義
亦近也通作亦詩亦服爾耕亦有高廩鄭箋並云亦大也不顯亦
世後漢書袁術傳注及魏書禮志作不顯奕世是其字通矣洪者

水之大也故說文云洪降水也降與洪音義同通作鴻書之洪水
史記俱作鴻水文選四子講德論云夫鴻均之世李善注鴻與洪
古字通也誕者詞之大也詩書誕皆訓大何誕之節今毛傳誕闊
也闊亦大矣戎者詩民勞傳云大也方言云凡物盛多謂之寇盛
多與大義亦近是寇戎其義同駿者玉篇云馬之美稱也美大義
近下文又云駿長也長大義亦近通作駿詩駿命不易駿極于天
禮記中庸大學及孔子閒居並引作駿又通作駿書夙夜浚明有
家釋文引馬融注浚大也詩噫嘻釋文浚本亦作駿又通作俊夏
小正云時有俊風初俊羔傳並云俊者大也說文云俊才過千人
也然則人之俊者爲大馬之駿者亦爲大山之峻者亦爲大水之
浚者亦爲大字雖異而音義同矣京者工之大也與墳同意釋
云絕高爲之京高亦大也故公羊桓九年傳云京者何大也京景
聲義同故白虎通云景者大也經典景俱訓大而亦爲明景从日
故訓明从京聲故又訓大矣碩者說文云碩大也與碩同意小爾
雅云碩遠也遠亦大也通作石漢書律曆志云石者大也匈奴傳
云石畫之臣甚眾文選爲曹公作書與孫權云明棄碩交李善注
碩與石古字通濯者方言云大也詩王公伊濯濯征徐國毛傳並
云濯大也王公伊濯釋文引韓詩云濯美也美亦大也說文美从
大與善同意故詩桑柔箋云善猶大也善訓大知美亦訓大矣許
者詩中許字毛傳並訓爲大通作芋方言許芋並云大也郭注芋
猶許也又云許亦作芋故詩云君子攸芋毛傳芋大也又通作吁
與吁詩溱洧釋文許韓詩作吁斯干釋文芋或作吁爾雅釋文許
本又作吁是皆以聲爲義也凡从于之字多訓大于亦訓大故方
言云于大也檀弓云于則于說者亦以爲廣大是矣字者亦从于
與許同說文云宇屋邊也蓋屋檐四垂爲屋之四邊天形象屋四
垂故曰天宇亦曰大宇逸周書寶典篇云七寬弘是謂寬宇荀子

非十二子篇云商字鬼瑣楊倞注字大也莊子齊物論篇釋文引尸子云天地四方曰宇然則宇之爲大可知矣穹者與宇同意故穹隆穹崇穹蒼其義皆謂天也漢書司馬相如傳云觸穹石張揖注穹石大石也通作空詩在彼空谷毛傳空大也文選注引韓詩作在彼穹谷薛君曰穹谷深谷也然則穹蓋深之大矣壬者詩有壬有林毛傳壬大也通作任仲氏任只傳亦云任大也史記律書云壬之爲言任也是任壬聲義同說文云壬象人裹妊之形故訓爲大矣路者詩申夷載路厥聲載路傳並云路大也經典凡言路寢路車路馬義皆爲大路本道路可以通達故謂之大或借爲輅玉篇云輅大車荀子哀公問篇注引舍人云輅車之大也後漢書張湛傳注引曲禮式路馬作軾輅馬云輅大也是輅路通矣淫者浸淫又久雨也浸久有過度之意故訓爲過過有麥泰之意故又爲大詩既有淫威毛傳淫大也文選十發云血脈淫濯李善注淫濯謂過度而且大也然則淫濯俱訓大本於爾雅也甫者男子之美稱美大義近故又爲大詩之甫田甫草及魴鰕甫甫傳並云大也說文云誦大也讀若通詩東有甫草文選東都賦注引韓詩作東有圃草薛君曰圃博也有博大茂草也後漢書班彪傳注引薛君傳作甫博也博與圃誦俱从甫聲故義皆爲大而其字亦通矣廢者奔之段音也說文云奔大也玉篇作樊又作𡗗同通作佛詩云佛時仔肩毛傳佛大也孔穎達不知段借之義故云佛之爲大其義未聞又通作廢郭引詩廢爲殘賊釋文云廢大也此王肅義列子楊朱篇云廢虐之主張湛注廢大也逸周書官人篇云華廢而誣是亦以廢爲大也壯者與樊同而聲近將其義亦相通借禮記射義云幼壯孝弟鄭注壯或爲將詩鮮我方將毛傳將壯也是二字義同字通廣雅云將美也又云將長也長美與大義亦近也冢者與墳義同與京義亦近說文云冢高墳也方言云冢秦晉之